

Angelo Terenzoni, *La diplomazia genovese al tempo della Pace di Vienna (1735-40)*, s.d., pagg. 96

Angelo Terenzoni, *La diplomazia della Repubblica Ligure. I – Da Montebello all’Assedio di Genova (1797-1800)*, s.d., pagg. 162

Questi atri doi libri “fæti in caza”, fruto de continoe rîcêrche inte l’Archivio de Stato, precêdan e sêgoan quello za presentou into boletin 3-2018, ch’o parlava da diplomazia zeneize de fronte a-a Rivoluçion Françeize (1788-97). O primmo o ne conta comme s’en mesciâ i nôstri diplomatici inte corti de Vienna, de Versailles e de Torin, e cöse àn posciuo ò no àn posciuo fâ pe-a seu patria.

O segundo o describe l’òperato di nôstri anbasciatoî inta Pariggi do Diretôio e pôi do Consolato, inta Milan Cizalpinn-a, a-a corte de Madrid, inta Romma republicann-a, a-e corti de Vienna e de Londra. Scicomme davanti a-o sototitolo gh’è in “I”, ghe saiâ sens’atro o ségoito.

Anche stavôtta no manca cartinn-e, ritræti e fotografie pe ’na pontoale ambientaçion.



Silvana Ghigino, *Il parco nascosto. Villa Pallavicini a Pegli*, Sagep Editori, Genova 2018, pagg. 240

Perché questo titolo, se o parco o l’è li a-a luxe do sô, o se vedde beniscimo e se ghe caminn-a drento? Perché quello che l’è ascozo, ma solo pe chi no-o sa vedde, o l’è o scignificato che comitante e progestista, o marchéize Ignaçio Lusciandro Pravexin e o Michê Cançio, gh’àn vo-scuiu dâ. L’aotrice, che da-o 2016 a dirige e a cura o parco, a l’â studiù e a se gh’è dedicâ pe ciù de trent’anni, pe scrovine i segreti e sarvalo da l’incuria e da l’abandon, ma anche da interventi sconsideræ che in cangio de risanalo l’aviéivan aroinù do tutto. Pe nôstra fortunna a sò fadiga a l’è stæta premiâ: do 2017 o parco o l’è stæto riconosciuo comme o ciù bèllo d’Italia tra quelli pùblich, e òua con questo libro inte man poemmo vixitalo con ciù sæximo e anche ciù piâxéi.



Giuseppe Felloni e Guido Laura, *Genova e la storia della finanza: dodici primati?*, Riccardo Campanella Begliomini Editore, Savona-Genova 2017, pagg. 112

Giuseppe Felloni, *La Casa di San Giorgio: finanza pubblica e credito*, Genova 2018, pagg. 112

O Felloni (1929-2017) o l’è stæto profesô de stôia econòmica de l’Universcitæ de Zena e, specce dòppo ese anæto in penscion do 2004, o s’ea pigiù a cheu e sòrti de l’inmenso e interesantissimo archivio do Banco de San Zôrzo, arivòu pe môma intrego finn-a a-i nôstri giorni e conservòu inte vinti sale de l’Archivio de Stato, ma senza ese inventariù in mòddo da rendilo consultabile da-i studioxi no solo d’economia ma da stôia in generale. Con quarche agiutto, o l’è ariescio a fâ a schedatua de tutte e ciù de 43.000 unitæ archivistiche e a métela inte ’n scito internet, [www.lacasadisangiorgio.it](http://www.lacasadisangiorgio.it), presentòu o 10 de mazzo do 2013 davanti a-e aotoritæ çitadinn-e e da aloa a disposiçion de tutti. O primmo libro o l’è scrito in italian e in inglêize, o segundo o l’è o catalogo da mostra fæta in quel’òcaxon, co-in ciù quattro saggi in sce l’argomento scriti da-o profesô tra o 1984 e o 2008.



Francesco Pittaluga, *Racconti d’oltremare*, Erga Edizioni, Genova 2018, pagg. 240

Dòppo o seu primmo libro, *Dinanzi... il Mare* (boletin 1-2018), dove o n’â contòu esperiense da sò vitta mesciâ con cöse de fantaxia, o nôstro Pitaluga o s’è torna felice-mente açimentòu co-a narativa con queste *Storie di uomini di terre e di mari vicini e lontani*, comme dixè o sototitolo. Anche stavôtta en vinti raconti, stôie de personn-e ciù ò meno sconosciùe che però inte quarche mainea en intræ inta sò vitta, e lê o l’â sentio o bezeugno de sarvane a memòia a mòddo seu, con sentimento, tra realtæ e fantaxia. Gh’è tanto da leze perché o l’â a penna façile (ansi, a tæstea), a scritûa a l’è bèlla scciassa e no gh’è de figue, e no manca e noçioin de stôia e giôgrafia, pe nôstra coltûa.

